

# 《我和她的故事》

作者: 第十三個人

Powered by [紙言](#)

# 第一章：我和她的邂逅

## 第一章：我和她的邂逅

一切嘅故事都要喺嗰日講起...

嗰日放學,我個死黨啊杰搭住我膊頭講

「喂！你睇吓,我琴日喺IG有條囡Hi我！」

「千幾follow,睇下先。Cherry...又幾靚女wor,啱晒你啦。」無奈嘅我話

「梗係啦!依條囡簡直同我天作之合。」佢望住我好得戚咁講

望住人又靚仔,成績又好,運動又勁,屋企又有錢嘅呀杰。

我好無奈,呢啲故事中先有嘅男主角,喺我隔離就有一個活生生嘅例子。

我喺心入面唉咗一聲。我唯有望住佢苦笑。

返到屋企之後,我拎起我部電話。突然見到IG多咗個新follower,仲要係女仔添,我撇咗入佢profile睇吓,見到佢有幾百followers,跟住望落去佢啲post度,見到一個關於佢失戀嘅post。

我就冇乜點擺上心,亦都無留意咁多

兩日後,

呀杰搭住我膊頭講,你睇吓依個.....

「聞住！你上次嗰個Cherry呢？」我好疑惑咁問佢

「唉,厭啦,佢都唔係話咁好啫,喂你睇下依個先,雖然冇千幾follow,但係睇吓佢story都幾唔錯。」

佢笑淫淫咁講

「睇過...」咦?依個未係follow咗我,嘅嗰個囡仔,我都有留意佢有post story

,見到佢自拍,我個心有一種好奇怪嘅感覺。

「都ok...啦...」我講。

「今次我志在必得！」望著佢得戚個樣,我真係冇話可說。

嗰晚我返到屋企,我撇入佢profile睇吓佢story,見到佢我真係好似有啲一見鐘情,見到佢眼大大,笑得好甜,再撇多一吓去咗下一個story,見到佢有個vote story, Chat?

點知我手多多撇咗落去,我撇完之後就有少少後悔,就係因為怕尷尬,雖然人哋好靚女,不過我唔知人哋點諗我,我淨係想做佢其中一個嘅follower就算。

不過我都無理太多,所以就繼續睇story。

過咗一陣,我收到佢reply,喺我個ig notification彈咗句 Hi >\_<

我有少少驚訝,我以為佢唔會點理我,話晒我地都無講過嘢,估唔到佢會真係會搵我,冇乜同囡仔傾計既我,我就覆咗

「Hi?」

「Do I Know you?」佢問。

「No。」我同佢講。我最怕嘅情況出現咗啦,尷尬,都唔知覆咩好。

依個就係我哋第一次嘅對話。

「Chat what?」我問

「冇所謂。」佢秒覆

我心諗係套路!?

無辦法，如果要同佢傾計就要制造話題，我又有啲咩可以同佢講？突然，我諗返起前幾日，佢出咗個失戀嘅post，於是我順水推舟。

「Hello，想問下你係咪失戀？」我話。

「邊有人同女仔講嘢，第一句嘢就問佢係咪失戀架」佢覆。

「欸係啲...」我心諗柒咗,不過總算打破咗我哋之間嘅一層尷尬嘅隔膜,起碼佢有覆我先...

「Sor...」

「唔緊要啦，都過咗一排啦，唔好講啲唔開心嘅事啦。」佢覆我。

「嗯。」

「見你story,你都有睇排球少年？」

我個心震咗一下，佢竟然都會留意我啲story

「係呀，我D friend 都有睇佢哋介紹我睇，睇下睇下就鍾意咗睇」

「我都係呀，我好鍾意睇。」

「你最中意邊個角色？」有機會緊係要問落去。

「我最中意日向翔陽，佢好型啊。」

「我都係呀，佢同影山一齊打波真係好好睇呀」

個晚我哋傾咗好耐，傾咗好多話題，我哋由十二點傾到凌晨三點，我哋由動漫傾到各自嘅興趣，再由日常瑣碎事傾到未來想做D咩，我哋就好似兩個好耐冇見嘅朋友一樣，係咁傾，係咁傾.....

但係現實係,我連佢叫咩名都唔知。

## 第二章：我和她的對話

### 第二章：我和她的對話

如是者我哋日日傾計,日日傾計。每日返到屋企第一件事就係IG DM 佢。佢就好似無形咁融入咗我嘅生活日常。依種關係一直維持到暑假。

直至有一日，

「喂！妳喺邊呀？返到屋企未？」我見到佢上線中,但係佢冇覆我。

唔知點解我個心有啲唔舒服,有啲想一直揸住個電話直至佢覆我為止。

過咗一陣佢終於覆我

「Sorry,啱啱同個friend傾計。」

「Friend? 男仔嚟㗎？」當然依啲心底話,我唔會講出口。

「OK,冇乜嘢呀嘛？」

「冇呀。」

「哦。」

我發現,我可能認為佢融入咗我生活,但係佢係咪真係都當我係佢嘅生活嘅一部份? 唔通依啲全部都係我一廂情願? 我一直以嚟都係騷擾緊佢? 而佢覆我,都只係因為禮貌上覆我? 我知道我有權利去強迫佢要去即刻覆我。但係佢唔覆我,我個心就會囉囉掙。依種感覺好難受。依種感覺係愛?

有一日,我見到佢Story「Ask me a question?」背景係一張佢嘅自拍,佢笑得好甜,眯起兩隻眼,我對幅相真係毫無抵抗力。試問邊個男人會討厭依個咁可愛嘅女仔。

我望住佢個story唔知點解上咗癮,我呆坐咗係我自己房,望住佢嘅story好似乜都做唔到,依一刻我唔淨止想做佢其中一個follower,我想.....我想更進一步.....我有諗佢會點諗我,我冒住比人覺得係痴漢嘅可能放手去問佢。

我擺起我部電話,我喺佢story問「你中意咩類型嘅男仔?」

我唔知自己痴咗邊條線,我膽粗粗咁send咗出去。我想知答案,我想知我係唔係佢嘅理想型,我...我想..... 嗰晚,我攤喺我張床上面,我訓唔著。我驚,我驚佢會唔覆我,我驚佢會唔知點諗我,我驚佢會唔中意我。我望住天花板,腦海中出現咗佢個樣,佢就好似天使對我微笑一樣,好溫柔,好溫柔。我就諗住佢個樣,慢慢進入咗夢鄉。

第日,我起身第一件事就係睇佢個story,

「睇feel。」只見我問佢嘅問題上,有咁嘅回覆。

我好無奈,個個都話睇feel,唔通個個都話自己係睇樣架咩,我唔排除佢真係睇feel,咁乜嘢係feel...

再揷下一個story .

「單身嗎？」見到佢有人問。

「Yep . 有無人想做我男朋友 . haha .」 嘅然佢都想搵個男朋友 . 點解我就唔可以努力的追佢返嚟 . 佢咁嘅回覆 . 又重新振作令我覺得要將依個女仔追返嚟。

幾日後 . 佢story出現咗我最唔想出現嘅畫面 . 居然有條友約咗我女神出街 ! 嗰下我好似比人好大力咁係我塊面度打咗一下 . 雖然就咁睇個story 唔知個男仔係邊個 . 不過手帶住隻G - shock 限量版個男仔一定好有錢。

嗰晚我dm佢 .

「今日去咗邊呀？」

「無呀 . 今日同個friend出咗街周圍行吓囉 .」 佢隔咗一陣之後覆我。

「哦。」

「得閒吹下水嗎？我哋好似好耐無一齊傾偈。」我尷尬咁問。

「都可以嘅。」

「你做緊咩呀？」

「攤喺張床上面 . 碌IG。」

「你有冇睇排球少年新一季？」我求其開Topic。

「緊係有啦 . 我作為粉絲緊係睇咗啦。」

「你今個星期六得閒嗎？」我見到已經有人約佢出去,自己個心覺得人有,我又要有。

「咁突然,都OK既...」

「Yes!」我情不自禁叫咗出嚟。

我房門被人推開咗,「冇嘢吓話,夜晚十二點喺到叫？」見到細佬兇狠嘅眼神衝咗入嚟。

「Sor...sor...」我緩緩地門門。

「咁喺邊度等？」我即刻囉起部電話問佢。

「你住邊？」佢覆。

「你住邊,我就你啦。」依啲時候梗係要咁做。

「將軍澳。」

「我哋都好近啫,星期六見。」

「哦。」我人生從來未事過咁興奮,真係想快啲到星期六呀。

就係咁 . 話咁快就到咗星期六.....

## 第三章：我和她第一次見面

### 第三章：我和她第一次見面

嗰日我起身嘅時候，我望出窗，晴空萬里，今日就好似連個天都幫我。幫我製造一個完美嘅氣氛。我睇衣櫃擺咗一套GU，再對住塊鏡睇度襯，嗯嗯，幾好。再去廁所梳靚個頭，緊住就去煮咗個早餐。坐係度食完嘢之後，就換埋套衫出門口。

「咁早去邊呀？」我細佬行出嚟問。  
「無，約咗個friend姐。」我好心虛咁講。  
「神神祕祕咁，女仔嚟架？」佢追問。  
「你理得我姐。」我一路著鞋一路答佢。

之後就衝咗出門口。我去到將軍澳站，企埋咗一邊開咗IG。

「我到咗啦你係邊呀？」  
「差唔多到啦。」佢覆我。

隔咗一陣，我係遠處見到個女仔周圍望。  
個女仔着住一件白Tee，黑色緊身褲，預住個細細地嘅斜預袋。係佢啦！  
我行埋去，咦？原來佢矮過我一個頭，不過佢細細粒仲得意。  
「Hello。」我講。  
「欸...Hello。」係老尷呀呀呀... 第一次見到女神，過然冇照騙，女神果然係女神。完全俾佢迷住咗。  
望住佢白淨嘅面龐，上面有水靈靈嘅眼珠，高挺嘅鼻，同埋櫻桃小嘴。

「喂！叫咗你好多聲啦！」佢抱怨。  
「Sor...Sorry...」我比佢從沉醉中拉返嚟現實。  
「係呢，你比係你IG D 相仲靚仔啫。」  
「...係咩？...」生平第一次比呀媽或者親戚以外嘅女人讚。我塊面變到紅晒。  
「今日嘅行程我已經plan 好晒啦。」我有少少得戚咁講。  
「搞到我好奇待添，我哋第一站去邊？」佢隻眼好似識發光咁問。  
「你食咗嘢未？」我體貼咁問。  
「食咗少少啦。」  
「咁使唔使再食？」  
「都可以嘅。」  
「好啦，咁我哋第一站就去Cafe食嘢先啦！」佢猛咁say yes  
，睇嚟唔係都可以嘅，直頭係好肚餓呀！

#### 我哋行去Cafe

嘅時候，佢隻手有意冇意咁點到我隻手，我嚇一嚇，我擰一擰個頭，望住佢。佢就好似唔知有依樣嘢發生緊咁，好開心咁向前行，對於佢嚟講好似無乜嘢咁，不過我好緊張，我每次同佢嘅接觸，就好似將我同佢嘅距離拉近咗。

行咗一陣，終於到咗間Cafe，我哋叫咗一份窩夫早餐，我望住佢食甜嘢個樣，我笑得甜過佢。

「你唔食呀？」

「望住你食唔食都無所謂啦...」我講。

「咩話？」

「無嘢，唔駛呀，你食啦，我食咗嘢喇。」好彩佢冇聽到我講嘅咩。

「你陣間有冇話想去邊呀？」我嘗試轉移話題。

「你唔係有晒計劃㗎喇咩？」佢問。

「有就有，不過睇下你有冇特別想去嘅地方啫。」

「冇所謂呀，周圍行下囉。」

「好呀。」

「去唔去海傍行下？」佢食完嘢之後，我問佢。

「都好呀。」

「去中環附近？坐幾個站就到架啦，好快，好快。」我問。

「好！」佢對我眨眼，依一下好似一箭穿過我個心，又好似有一股電流電擊我全身。我全身都比佢麻痺咗。

我哋上咗地鐵，我捱咗車廂側邊，佢企咗喺我對面。喺車程都唔知要做嘢咩好，唯有拎部電話出嚟睇。過咗一陣我望上去，見到佢都係喺度碌電話，哇，我女神認真個樣好Cute。當我望得着迷嘅時候，佢突然望返住我，嗰一秒我哋眼神接觸咗。

OH...我即刻望返部電話，扮係到睇緊電話...唔知佢會唔會覺得我係個痴漢...

「下一站，上環...」頂，過晒站，掛住諗其他嘢，搞到過晒站。

「過晒站添...不如橫掂都係，不如我哋行下？」我拍一拍佢膊頭同佢講。

「好呀，啱啱食完嘢，行下消化下囉。」佢望一望周圍講。

道門突然閃埋，我一個箭步跨出去，我順手拉咗佢出車。

「道門又會突然之間閃嘅...」我望住佢講。

佢望住我一言不發，我望落去，我見到佢喺度拖住女神隻手，我嚇咗一嚇，估唔到我居然拖住女神隻手...我即刻鬆手，

「唔好意思，頭先道門突然之間閃，所以先...」我摸一摸自己個頭講。

「唔緊要...」佢塊面紅晒，白裡透紅中睇得出佢其實真係幾尷尬。

我哋行出地鐵嘅出口，佢輕快嘅腳步顯得佢有啲緊張。我加快腳步，追上佢嘅步速，慢慢喺後面跟住佢。

行咗十幾分鐘，我見佢漫無目的咁行所以問佢。

「你行緊去邊架？」佢冇應到我...我拍一拍佢膊頭。

「啊，咩事呀？」佢嚇一嚇。

「吓，無呀，我問您行緊去邊，你無應我所以拍你膊頭囉。無乜嘢啊嘛？」

「ERRRR...我唔知喎。」佢對住我苦笑。

「吓，咁你又行？」我笑住回應佢。

「我哋前面好似有電車站，我哋唯有坐電車返去啦。」我聳一聳膊頭。

「好！」佢回應。

我哋行前咗少少，上咗咁啱到站，坐返去中環。

上咗電車之後，我哋上咗一層。我哋坐咗係對方嘅隔離，我好如常咁戴起咗一邊嘅耳機，耳邊嘅音樂輕輕響起。我望向佢，喺太陽光底下嘅佢好似更加靚女，更加令我著迷。

正當我陶醉嘅時候，佢突然望向我，我依然靦腆咁低下頭。我恨自己唔夠努力，眼前有一個咁完美嘅女神，竟然沒辦法好好把握。佢突然間搶過我一邊嘅耳機，

「你聽緊咩啊，我哋一齊聽啊。」

「願我可花足一生和你甜蜜，再走到一百歲那誌慶場合...」依個時候響起咗我最鍾意Dear Jane 嘅2084。

我哋就係咁，靜靜咁聽住歌，慢慢咁坐去目的地。

佢突然捱咗個頭係我膊頭到。嚟唔切反應嘅我，好幸運咁，上演咗無數人都希望會發生喺自己身上嘅事，當時嘅一切就好似韓劇般浪漫。就算而家每一次回想起都會令我由心底裏笑出嚟。

去到中環，我哋落咗車，個日已經係四點幾，我哋喺海傍慢慢，慢慢咁行。我主動幫佢打卡同影相，影咗半個鐘。

突然佢拎起部電話，

「唔好意思，我要走先啦。」

「走先喇，係咁先啦，下次再玩喇。」依個歌詞突然之間響起。

「點...點解嘅？」未講完依句嘢佢已經走咗。

我望住佢，突然之間有個男仔行埋去講咗幾句嘢之後，佢就跟住個男孩走咗。

我諗住行前啲望真啲睇下個男仔係邊個，但係...

嗰個係...係...係呀杰？！



## 第四章：我和她之間出現了一個情敵？！

第四章：我和她之間出現了一個情敵？！

我唔敢面對件事佢同呀杰喺埋咗一齊。

日日就係到癩，我無搵佢，就算佢搵我，我都無覆佢。如果一個女仔主動搵你，好明顯你係佢心入面已經佔咗一個席位，如果佢唔主動搵你，佢心入面一定無你。雖然我依家知道佢心入面都有我，不過可能我都只係一個坐喺後備坐嘅傻仔。

就係咁暑假好快就過咗...

開學第一日，我帶著疲倦嘅身軀返學，正當我踏入學校門口迎接新一年嘅時候，

「喂，暑假過成點呀？」呀杰拍一拍我個頭問我。

「OK...」自從發生咗我見到個件事之後，我唔係好想理佢。

好，我...我承認我呷醋，雖然我知道我同佢身份，簡直係天淵之別。

但係我哋真係差咁遠咩？

我同佢鍾意咗同一個女仔，唔通就係因為我同佢差咁遠，就要拱手讓畀呀杰？

我唔想就咁輸比呀杰，我...

「冇乜嘢呀嘛？成個人呆晒咁嘅？」佢問我。

「喔...無嘢。」佢將我拉返嚟現實。

「行啦，做晒功課未呀？」佢向住我單眼。

「欸，七七八八啦...」我hea覆佢。

我同呀杰細個嘅時候就已經識，我哋由幼稚園，小學，到而家中學我哋都係同一間學校，佢就好似我阿哥咁好照顧我。無論我有咩事佢都好有義氣，幫我食死貓，就好似有一次佢上我屋企，我哋打咗好耐機，我一鋪都無贏過佢。最後我玩得大激動，將個手掣打落部電視到。我嗰下被怒氣沖昏咗頭腦，不過當我以為呀杰會篤我背脊嘅時候，佢主動衝出嚟幫我食死貓...

其實呀杰真係我一世嘅兄弟，佢對我咁好，我自動棄權讓返佢一次都好合理姐，但係我日夜都思念嘅女仔就咁送比人，我...我...我過唔到自己心入面個關，要我退出我真係做唔到。

嗰日我放咗學馬上返咗屋企，我攤咗係張床度，拎起部電話開咗佢IG，我諗咗好耐，我決定放棄...

儘管如是，我相信自己，我相信自己嘅決定，我會喺依度默默咁支持佢哋。

我默默咁擺低咗部電話。我哋大家都無再搵大家。

過咗一個星期後，呀杰佢DM我，

「你今個星期六得唔得閒呀？」

我心諗，呀杰甚少約我，佢約我係咩事呢？發生咗啲咩事？佢唔通要同我講佢哋係埋咗一齊？唔通...

唔通係我諗多咗？

而家每次呀杰搵我講嘢，我都情不自禁咁聯想到佢...

「可以。」

「老地方等啦。」

佢究竟搵我咩事呢？

到咗星期六，我感覺上今日好似有啲特別嘢，我又講唔出係咩。

「阿哥，早晨，生日快樂呀！」

係嗎！今日係我生日，依排為咗防止自己喺咁諗嘢，我每日返屋企就溫書，做功課，為咗充實自己生活，為咗唔想自己再諗。竟然唔覺今日就係我生日。

「嚇死人咩，從來都無聽過你叫阿哥，Anyways，多謝細路。」

我摸一摸佢個頭，微笑回應佢。

我落去樓下坐喺公園等佢。

隔咗一陣，我見到呀杰同佢行過嚟，我諗嘅嘢果然出現咗。

「Yo，到咗啦？」呀杰向我揮手。

「唔。」

「生日快樂呀！」佢向我講。

「多謝...」我唔敢直視佢。

「對唔住呀，我知你嬲咗我，嗰日我唔係有心搵低你架。」佢都幾識留意人。

「其實我知今日係你生日，我又知你同呀杰係最好嘅兄弟，嗰日我咪同佢去揀禮物比你囉。我約咗佢但係我唔記得咗，對唔住呀唔好嬲啦。」佢隻眼水汪汪，好似如果我話唔原諒佢嘅話，佢就會喊出嚟咁。聽完佢解釋，再望住佢依家咁嘅樣，我都比佢真誠打動咗，原來我誤會咗佢嘞。

「我方嬲嗎。」我話，我真係冇嬲，只係呷醋姐。

「你無嬲？講笑咩，日日都黑口黑面...」呀杰喺度口噏噏。

「唔好再大聲啲？」我打一打佢個頭。

「送你架，生日快樂。」佢眯起隻眼講，晨早嘅餘光照落佢塊面度。

佢送咗一個手工嘅皮製銀包比我，仲要刻咗我個名上去，十隻手指有六隻手指都黏住咗膠布，我見到但係我方講到出嚟。

「多謝你呀。」

「你哋兩個拍拖啦，當我方到。」呀杰喺度偷笑。

我哋望住對方，我即時面紅晒。

「我有嘢做走先，你哋慢慢啦。」呀杰轉身就走人。

留低我同佢，兩個人。

跟住就係，我同佢第二次見面...

## 第五章：我和她不再是朋友

第五章：我和她不再是朋友...

就係咁淨返我哋兩個呆呆咁企係到，電話係我褲袋入面震咗一震，我拎起部電話，只見到呀杰sent 咗個咁嘅message比我。

「兄弟，唔好話我唔成全你呀，同人表白啦。」後面仲要加咗個emoji。

「痴線，咪玩啦.....」呀杰果然係我兄弟，知道我心入面都真係咁諗.....

「你塊面咁紅嘅？」佢突然開口，我都唔記得佢係我隔離添.....我口裡說不，身體卻很誠實。

「冇，見到靚女姐.....」我好自然咁拋低依句嘢.....

今日嘅佢，着咗一件碎花裙，預咗一個紫藍色嘅袋仔，成熟得嚟，又帶幾分稚氣。

「有咩，依度得我哋兩個咋喎！講緊我？」佢得戚咁講。

「唔知呢？」我答佢。

「哼，唔理你.....」佢將佢美麗嘅面孔擰埋一面。

「Sorry呀，對唔住呀靚女。」我企係佢後面道歉。

「哼！」佢蠻不講理，無視我嘅道歉，成個港女咁向前行。

我唯有使出我嘅招數應對佢。

「最多請你食嘢啦.....」我故意提高聲線大聲咁講。

「好啊！食咩呀，其實你應該一早咁講喇，送咗個銀包比你，你起碼要請我食返幾餐飯啦，仲整到我隻手損晒.....」佢個口連珠爆發，嘟起個嘴，眼睛水汪汪咁望住我，向住我撒嬌。

面對連環嘅勾魂攻擊，我最終敗陣.....

「多謝喎，咁大方。」明明就係佢屈我請佢食飯.....

「唔駛，你鍾意咪得囉。」望住一碟碟高貴嘅魚生，送過嚟我哋張枱到，我感覺到我銀包喺到喊緊。

正當我諗住拎起筷子食嘢嘅時候，

「喂呀，唔准食呀，等我影埋相先啦，你幫我影啦。」佢遞佢部電話比我。

我反一反白眼，擺咗佢部電話幫佢影。

影影下，部電話自動熄咗機，又要重新解鎖.....「又嚟喇，好心就整個啲設定先影相啦。」我無奈咁講。「你過嚟呀.....」佢笑道。

我行埋佢心諗佢搞乜花臣，突然佢拎起我隻手，將我隻手指擺係指紋解鎖嘅果個位。突然將我拉埋佢身邊，我感覺到我心跳加速，並同時有咗生理反應，佢將我隻手指係指紋解鎖個位來回兩三次之後...「咁咪得囉。」佢奸笑道。「唔...」我尷尬回應道，我仲未反應到頭先發生咗咩事...

影多咗十分鐘之後，終於影完，我就好似工具人一樣，任佢魚肉。不過唔知點解，我唔識拒絕佢。

「唉，食到好飽呀。」我話，擺明就暗示佢唔好再嗌嘢食。

「係咩？我仲可以食埋甜品先啫。」佢一臉天真咁講，擺明就唔明我暗示。

「唔該要兩件芝士蛋糕！」佢舉手叫道。我心諗，佢都幾識照顧人，居然幫我嗌埋，（雖然用我啲錢）

隔咗一陣，侍應拎咗兩件芝士蛋糕過嚟，我伸手拎咗一件

「做咩呀你？」佢一臉詫異咁望住我。

「吓，擺蛋糕食囉。」我回答。

「要食就自己嗌啦！」佢就係皺起條眉望著我，佢嘅時候都幾可愛。

「吓，你唔係幫我嗌埋架咩。」我問。

「我自己食架，我要食兩件.....」真陰毒，眼淚喺眼框裡打轉，求我比返佢食兩件，真係囉依個女人無辦法。我唯有拎返比佢，同時拎部電話出嚟，諗住等佢食埋先。

「你慢慢食啦。」我講。

「唔。」佢答到。

見到電話呀杰問，點呀？進度如何？我Sent咗個反白眼嘅emoji比佢。

「走啦！我食完啦！」佢話，舉起V字嘅手勢。

「好呀，終於食完嚟。」我深呼吸咗一下。

「好啦，行啦！去摩天輪，好想去個邊影相。」佢又擺出可憐嘅表情。

「行啦，行啦，傻妹。」我用平時老豆嘅語氣同佢講。

行到中環嘅行人天橋嘅時候，出面太陽完全被人遮住咗，灰雲滿佈，就好似隨時都會落雨咁。

果然，當我哋離開咗行人天橋嘅時候，一粒一粒綠豆咁大粒嘅雨水晒落嚟，我諗都唔諗就係我個「百寶袋」拎咗把遮出來。我將把遮擺喺，我哋兩個之間，但係發覺佢眯起隻眼，睇嚟係啲雨水，我唔忍心見到佢咁，我將把遮向佢挪移半個膊頭令佢可以見到前面，佢主動拖住我隻右手，身體傾向我。

我同佢有咗肌膚之親，感覺上就連關係都隨之升級。

唔通依場雨，係上天為我預備嘅？

「想和你一起撐傘漫步雨中 默默牽手走過」原來歌詞入面嘅故事都會成真.....

旁人望過嚟，我哋就好似一對熱戀中嘅情侶，互相依靠對方，溫馨咁拖住手，喺浪漫嘅雨中漫步。我同佢唔通都可以有一個美好嘅結局？

行到摩天輪，落雨嘅情況好似慢慢變好，一絲嘅陽光奮力係灰雲中照落，摩天輪上。唔通依個係上天俾我嘅啟示？我同佢狼狽拎住把遮，咁行咗喺摩天輪下，匆匆忙忙咁喺個度買咗飛就上咗去。

「你左邊膊頭濕晒啫，Sorry呀，最衰都係我有帶遮。」佢委屈咁講。

「唔緊要啦。」傻啦，你唔帶遮我仲開心啦。

「我幫你抹返。」佢說罷就喺佢個袋度拎張紙巾出嚟。

我呆呆咁坐係到，佢就好似女朋友照顧男朋友一樣，體貼咁幫我抹走身上嘅雨水。

突然，佢比地下嘅雨水滑倒，僕倒在我的身上，我哋兩目交投望住對方，我哋越靠越近，最終我哋錫咗對方。

佢嘅櫻桃小嘴十分紅潤，我錫佢嘅時候就好似，就好似.....我唔識形容，總之錫到女神，係我一生人都冇諗過會發生嘅事。所以我決定咗一生人最瘋狂嘅事。

「咳咳，」我清一清喉嚨。

「欸...欸...我鍾意你，可唔可以做我女朋友。」我支支吾吾咁講。

「可...可以。」佢擰埋一面細聲靚腴咁講。

我和她不再是朋友，而是男女朋友.....

# 最終章：我和她的後記

最終章：我和她的後記

「嘟——嘟——」我喺睡夢中聽到我手機響。

我伸隻手去床尾,擺起我部電話。心諗邊個係星期六咁早打電話比我,心入面不禁暗罵咗句粗口...

「喂！B 醒咗未呀？早晨呀。」一把可愛清晰嘅聲音傳入我隻耳。

「(咳)醒...醒咗啦.....咩事呀？」聽到係女朋友打俾我，清一清喉嚨馬上坐直。

「冇呀，我睇下你醒咗未呀嗎！咁你醒咗未？」佢問。

自從我哋一齊咗之後，我每日都有打俾對方。係安全感，係安全感令我會打俾佢。

「醒咗喇.....」我不耐煩咁講,始終係星期六俾人咁早叫醒，係有啲燥底，雖然係咁，但都係女朋友最大.....

「嚟搵你食早餐？好唔好呀？」佢嬌嗲咁問我。

「好好好，咁30分鐘之後喺你樓下等啦。」我著住拖鞋，條頸托住電話覆佢。

「陣間見！」佢係電話另一頭叫喊道。

「好好。」我伸一伸懶腰，就走去梳洗準備

30分鐘後.....

我企咗係OK便利店門口，碌住手機等佢。

「估下我係邊個？」一把熟悉嘅聲音喺我背後響起。

「唔知呀.....」我奸笑咁講。

「好衰囉！」佢伸個頭係我隔離講。

「唔好嬲啦。」我擰轉個頭成隻手摸摸佢個頭。

今日，佢身著住慵懶feel嘅衫，一件普通嘅格仔tee，短褲，拖鞋，再加埋金絲圓框眼鏡。

其實佢唔使著到咁靚，就好似今日咁普普通通，一對情侶就係咁就已經足夠。

我拖起佢隻手，十指緊扣咁行，就好似同全世界講佢係我女朋友一樣，佢就好似我哋第一次遇見咁，羞澀咁用雙眼望著我，我拖住佢一直行。經過馬路嘅時候，我刻意比佢企係行人道入面，盡顯暖男要做嘅嘢。

我哋行到去第一次見嘅Cafe到，佢話佢唔係好肚餓，我哋嗌咗一個餐share食。嗌咗個牛角包同一杯嘢飲。

食物嚟到之後，我將牛角包切開一半，再少少咁切比佢食，我伸把叉去餵佢食，佢嘴張開紅潤嘅咀，輕力咁咬咗落去。我再拎起同一支叉，餵自己食，我唔記得個包係咩味，我淨係知個包好甜...好甜...好甜.....

我記得食完嘢之後，我哋行咗去海邊，我哋乜都冇講

我拖住佢一直行，一直行，行到幸福嘅盡頭.....

。

。

。

。

。

。

。

多謝你，多謝你熙然.....